

鄭端簡公奏議

鄭端簡公奏議卷之十一

門人項篤壽校梓

兵部類

掣做工京營正兵疏

題為傳報緊急聲息事職方清吏司叅呈節據薊鎮  
傳報大虜駐劄邊外窺伺黃花鎮古北口大水峪等  
處又據居庸關報到地名滴水崖柞口墩遶賊拆口  
哨馬過邊切近 陵寢京師關係甚重所據京營兵  
馬相應整搦以備不虞呈乞議處案呈到部為照前  
項聲息緊急 陵京重地慮宜萬全但京營官軍連

月供役不得休息十分疲憊況自來工後未有京營  
官軍不分正兵備兵盡數輪撥做工者近日累經京  
營戎政文武大臣題奏未見區處萬一虜警日急方  
行掣軍驅之行陣不惟勇氣難於振作恐衣鞋器械  
亦多缺乏見今開操教場營伍稀疎甚非所以居重  
馭輕奮揚威武也臣某叨蒙 聖恩特令暫管部事  
日夕靡寧欲將該營原選聽征出戰官軍三萬五千  
員名免其做工行令戎政大臣定委謀勇將官十員  
整棚操練遇警分布戰守仍行戶部即查數月未給  
馬草料本折色餽養馬足如工所應役不敷仍乞

勅令提督工程總協京營內外文武大臣及監察工  
程巡視京營科道從長計議况錢糧缺乏尚可支撐  
官軍耗散粹難齊備工程營務事體俱為重大豈得  
顧此失彼伏乞 聖明留意速賜施行臣等不勝幸  
甚緣係傳報緊急聲息事理未敢擅便謹題請 旨  
三月二十二日奉 聖旨原選聽征官軍着即回營  
操練工所缺人應役你每會同工部議處來說欽此  
會議做工軍夫疏

題為傳報緊急聲息事職方清吏司案呈近該本部  
題奉 聖旨原選聽征官軍着即回營操練工所缺

人應後你每會同工部議處來說欽此欽遵抄捧送  
司卷查先爲欽奉 聖諭事該禮部等衙門會議內  
稱查得先年鼎建 四郊兵部軍少摺撥不敷動支  
馬價銀兩雇夫應後但今工程浩大官軍必不能敷  
兵部速處馬價銀三十萬兩付工應用等因奉 聖  
旨都准議行欽此又該鎮遠侯顧 等題前事本部  
議得大工重務宜當多方求濟豈在獨役京軍以虛  
營伍所據原題本部叻工馬價銀三十萬兩相應催  
夫與軍相兼應後等因奉 聖旨是欽此及查京營  
做工官軍先該本部及監察工程科道定議以十分

為率京營七分錦騰五衛三分原議軍夫四萬名京營該出二萬八千名照數速撥做工俱經通行去後又准戎政衙門查報撥軍做工數目大朝門工三萬名壽明殿及城垣等工共一萬五千名尚未撥足又三大營官軍除原選聽征三萬五千名外止有正兵四萬四千五十一名備兵三萬六千八百三十八名班軍已到八千四百七十五名未到一萬九千六百六十四名今該前因通查呈乞遵奉明旨會同議處案呈到部臣等會同太子少保工部尚書臣歐陽等議得門樓工程原議京營做工官軍二

萬八千名後因木料石料重大又工作繁興添至三萬名即今仰仗 皇上玄德格 天人情樂於趨事門樓工程行將告成止要搬運木石磚瓦爲力頗輕相應仍照原議二萬八千名聽戎政官就於京班官軍數內輪流撥用再若不敷仍照禮工等衙門會議并兵部議題奉有 明旨准令軍夫不足聽工部僱夫幫貼決不敢致工所缺人應役上 聖慮若軍數發銀兩不必動支存留以俟 殿工兵作隨宜處福此後搬運稍完用力不多悉聽監察工程科道官酌量裁減 壽明殿 上高玄殿 雷寔洪慶殿

重簷金殿石山子西苑蹶水城垣各工除工部民  
夫外合用軍夫聽戎政大臣查酌已未與工量度先  
後緩急將京班官軍相兼撥用如此庶幾工程速完  
戎政修舉人不告勞財不妄費矣伏乞 皇上俯賜  
裁察允行臣等不勝幸甚題奉 聖旨是欵此

查催覈冊疏

題為查催覈功文冊事職方清吏司案呈照得近因  
浙直等處征倭獲功人役告各通狀要得不候覈冊  
先行授職陞級於例有碍呈乞議處等因案呈到部  
為照 國家軍功陞賞凡遇各處奏報功次奉 旨



下部該職方清吏司查呈咨行都察院劄行巡按御史覈實覈冊到部又該武選清吏司查呈擬議陞賞具奏定奪此定例也近年浙江直隸福建奏到剿倭功次已經通行覈實去後間有覈冊到部陸續題

請陞賞然未到者尚多以致各處獲功之人每每各告通狀輒要不候覈冊先陞職級若與准行恐職級既陞覈冊不准復行查革未免牴牾况據一狀具一疏而陞一官煩瀆 聖覽數厘 批咨尤非所以重王言而齊邦政也伏望 皇上容令臣等恭候 命下之日移咨都察院劄行各該巡按御史通將先奏

獲功員役不分職級已未陞授據覈冊已未報到作  
速逐一嚴加查考中間如有倚恃勢豪依附親識脫  
罪藏身奪功冒報及巧立名色如賚旗督陣出奇放  
火躡路進兵踰城報信等項俱要照例查革其有罪  
重於功仍須問罪功可贖罪量與准贖若委果在陣  
獲斬首級亦要作急覈報以憑議擬陞賞具奏 定  
奪夫功不速賞無以勸勵官兵賞不當功何以慎重  
名器必須據理執法分別真偽豈得遠怨持疑耽延  
歲月伏乞 聖明俯賜裁察施行臣等不勝幸甚嘉  
靖三十七年四月初五日進初七日奉 聖旨是欽

此

叅大同撫鎮朱笈龔業疏

題為懦弱鎮巡大臣負國厚恩乞賜究治以正國法事職方清吏司案呈奉本部送兵科抄出巡按直隸監察御史樂尚約題竊惟邊方之臣所係甚重而大同一鎮又九邊之最要者此右衛之圍未解內外臣工皆寢食不安以分皇上宵旰之慮而地方任事之臣顧可臨難推避以誤朝廷之大事乎臣按大同總兵官龔業身為大將未建奇功當虜寇未入之時不能選士練兵以為戰守及虜寇既出之後

不能設謀運策以通糧餉遂使右衛孤城被圍日久而業不能發一矢以除右衛之零賊業之在地方所為者抑何事乎衝鋒破敵戰勝攻取此總兵之責也業已不能矣而反遺害於地方朝廷設總兵以鎮沙漠者果安在哉巡撫大同右僉都御史朱笈擢自副使專治一方先事而不能預處兵糧以備虜酋之侵犯後事而不能激勵將士以致虜勢之久淹遂使大同一鎮墩堡空虛而笈不聞遣一士以探右衛之虛實笈之在地方所為者又何事乎撫安軍民保鞏疆土此巡撫之責也笈已不能矣而反觀望以失事機

朝廷之設巡撫以寄安懷者果安在哉右衛之事危急已甚二臣者不即時奏請調集兵馬糧餉以剷除虜患待皇上延訪得實下朝廷會議二臣者不即罷黜仍留別用此皇上天高地厚之恩裒屍馬革不足以報聖恩於萬一也乃復各爲保全之計念國事之難臣於本年三月二十一日至宣府到任即訪二臣欺慢之事以憑題請聞隨據鎮守大同總兵官龔業手本爲主將患病請官暫代事照得本職於嘉靖三十七年三月初十日大虜二萬至馬邑地方本職督率官軍馳至山陰周家庄等處拒虜

就彼野宿不意天作大雨感寒入骨頭目眩暈致將  
渾身疼痛醫藥不效但今虜首見屯右衛地方職係  
主將分當身先士卒不能挽弓躍馬若不請官暫代  
大虜一時突入不無誤事合候詳允乞委隣近將官  
一員管理其事容令本職回衛調理等因到臣續聞  
巡撫朱笈於本月二十日已離大同至渾源州候新  
任巡撫楊選交代臣以二臣荷 國厚恩又蒙 皇  
上宥其失事之罪二臣交代有日豈肯犯不忠之罪  
以自干乎國法哉臣隨訪之地方則龔業果稱病不  
出朱笈果離大同鎮城矣是二臣者不惟失事於在

任之時復不感 聖恩於既 赦之後此 國法之  
所難容人情之所痛恨者也臣恭照大同總兵官龔  
業原以小知之才叨膺大將之任心忘報 國虛掌  
一鎮之官兵志在保身沮喪三軍之勇氣不力疾以  
從戎敢駕言以回衛無見危授命之忠為臨難苟免  
之計巡撫大同都御史朱笈器非宏濶才本庸常承  
目前之僥倖自保令名昧事後之長圖罔思 國法  
數日之勞不肯少待地方之罪屬之何人是皆推奸  
避事負 國厚恩所當併究者也再照兩鎮文武之  
臣數十年來或以微功而妄叨 恩賞或假微罪而

辭免重任苟且遷延邊防大壞若不昭明賞罰以寓  
激勸之典將來任事之臣安知不以業與笈之二臣  
者而為例哉伏望 聖上軫念邊方將龔業朱笈併  
加究治庶 國法明而失事者不得以遂其奸人心  
安而任事者益知所勉勵矣等因奉 聖旨兵部叅  
看了來說欽此欽遵抄出送司查得先該本院題為  
傳奉事議得巡撫大同都御史朱笈鎮守總兵官龔  
業不堪倚任合將龔業革任聽調朱笈吏部徑自議  
奏定奪題奉 聖旨是龔業着革任聽調員缺即日  
會官推補欽此欽遵朱笈移咨吏部徑自議擬調用



去後今該前因查呈到部看得巡按直隸御史欒尚  
約題稱大同總兵官龔業巡撫都御史朱笈一則敢  
駕言托疾回衛無見危授命之忠一則假交代遽離  
鎮城為僥倖苟免之計是皆推奸避事負國厚恩  
乞要併加究治一節為照大同右衛被虜圍困患切  
剝膚至屢我皇上宵旰至懷聖諭屢下勉飭臣  
工共效忠赤期解倒懸凡為臣子莫不思欲滅此賊  
而後朝食今龔業朱笈身任鎮巡誤事至此皇上  
寬宥其罪仍畱調用詎意二臣不思天高地厚之恩  
祇為全身自保之計龔業托有疾而高枕偷安軍機

重務若罔聞知朱笈倣交代而輕離重鎮地方安危  
置諸度外若不併加重治何以警惕臣工既該巡按  
御史樂尚約題叅前來相應議擬題請合候 命下  
將龔業先行革去職級仍行巡按御史提問具奏朱  
笈先行革職為民仍候大同事寧之日通查議奏處  
治以為將來不忠不職者之戒惟復別有定奪嘉靖  
三十七年四月初一日暫管兵部事刑部尚書鄭  
等具題初三日奉 聖旨是龔業革去職級巡按御  
史提問具奏朱笈革了職為民欽此

覆大同右衛兵糧疏

題為虜勢重大懇乞

天恩速賜議處兵食以安重

鎮事職方清吏司案呈奉本部送兵科抄出巡按直隸監察御史樂尚約題臣以菲薄之才叨承上命巡按宣大地方適虜寇猖獗之久文武更替之初臣夙夜驚惶恐不能舒我皇上北顧之憂臣自渡關而北訪之將官詢諸父老皆曰大同右衛虜酋盤據糧餉未通將來之事恐難持久臣聞之不勝恐懼即差人密訪以憑題請問隨據暫署叅將尚表呈稱右衛自去年九月達賊進入為患阻塞道路續於十二月內虜酋聯營環城住困今將六月有餘更番搶掠

况右衛城去春遭困軍民疾苦未蘇秋無所收城無積蓄倉糧有數支用已盡臣於城中富室之家勸借銀米給軍兩月支用并買牲畜尋剥樹皮遣度糊口緣虜賊未遭大挫縱橫無忌城門堵塞柴米盡絕殍死者十有八九十分危急合無俯念邊城緊要重地百萬生靈速為議處乘此春方草枯馬弱之時速當調兵數萬大破虜賊廣運糧米以救生靈倒懸之急等因到臣臣為照右衛自去歲春間虜賊綿延不出以致糧餉不能前進且姦細甚多鎮城稍有舉動虜賊必先知而禦之故糧餉屢發而屢不能抵右衛之

城也夫糧餉不繼必宰牲畜以聊饑採樵不通必毀  
居房以供爨牲畜既盡水火復竭不必外寇之困圍  
而城中之人豈盡必其臨難而不避哉所恃者 皇  
上浩蕩之恩洽於邊地故右衛之人雖危急若此而  
終無異志耳臣愚以右衛者宣大兩鎮之門戶也右  
衛不能守則宣大之勢必不能支宣大不能相維則  
虜賊之勢日近於內而 陵寢不免震驚是右衛之  
存亡固邊關得失之所係也臣敢以邊事之廢悉爲  
我 皇上陳之夫中國之所恃以拒胡虜者邊墻也  
然邊墻大壞雖始於逆鸞而防守日廢於因循故虜

賊擁衆而入若履無人之境是邊牆不足以拒虜矣  
邊牆不足以拒虜所恃者墩堡也然墩堡之內衆寡  
懸絕強弱大異虜賊一臨勢如破竹是墩堡不足以  
言守矣墩堡不能守則所恃者城池也今右衛孤懸  
於外往來不通虜賊據形勢之上而我兵犯兵家之  
忌是城池不足以言高深矣邊牆不能拒之於外墩  
堡不能守之於中城池不能守之於內使將勇兵強  
糧餉充足猶可以爲戰守之計也臣見得兩鎮地方  
耕耘久廢倉無以謀生商賈不通財無以生利饑饉  
相因家無積蓄雖戶部發銀動至數萬然銀一兩買

米不及四斗則軍士一名所給之銀能幾何所易之粟能幾何哉故兵懦而不能戰馬疲而不能策我軍單弱而散虜勢衆多而聚虜酋一入每每驅搶掠漢人以爲鄉導以爲先鋒我軍已不能當况復加以虜騎數萬之精兵耶雖有張安劉岳之勇速難以取勝况今之將官萬萬不及於古人者哉今事急而爲之備已屬下策若復日延一日不惟右衛之圍漸不可解而虜賊之害豈臣之所能逆覩者與伏望 皇上 厥勅戶兵二部大破常格急爲調兵運餉之舉仍乞 天語叮嚀總督侍郎江東嚴督鎮巡官員同心協力

以解右衛之圍然後邊方之事庶可以次第舉行臣  
初至地方若不早行奏請以致將來地方失事臣雖  
萬死莫贖臣又訪得大同副總兵官王尚忠志雖廉  
雅才欠發揚當此右衛危急之時恐非尚忠之所能  
展布者也又訪得原任叅將尚表勇謀兼全威名素  
重年雖長而經練頗深勢雖危而忠勤益著右衛之  
圍非表率倡士卒斷不能守合無 勅下兵部再加  
議擬如果臣言不謬將王尚忠別用即以尚表代之  
特右衛解圍之後重加陞賞庶表益知感激而右衛  
可保全矣等因奉 聖旨兵部看了來說欽此抄出



送司卷查先為瀝陳虜患十分異常懇乞 宸斷蚤  
賜議處兵馬錢糧以圖戰守以固疆圉事該總督宣  
大侍郎楊順題修復屯堡添發錢糧該本部覆議左  
右威平沿邊一路添堡二十座先通四衛血脉本部  
與戶部共發銀二萬兩解赴總督專備軍門給賞獲  
功軍士題奉 聖旨都准議行該發銀兩作速運去  
不許延誤欽此又為緊急聲息事據大同總兵官龔  
業開報右衛圍困倉積錢糧已盡速發帑銀接濟等  
情本部覆題奉 聖旨是着戶部發銀十萬兩差郎  
中一員作速運送大同地方濟困督撫官等選調兵

馬驅賊出境不許怠誤欽此又奉 聖諭近日邊臣

屢疏奏討糧餉戶部不能給發好生怠視朕念邊民

受困工部取到工資贓罰等銀暫且發大同右衛五

萬兩薊鎮二萬兩兵部發馬價銀一萬兩於宣府便

差勤事官作速運去濟急應用欽此該本部 題為

傳奉事條陳救援右衛戰守宜合行督撫等官選調

山西正遊兵各一枝宣府奇遊兵各一枝大同正奇

遊兵三枝渾源礦兵并延綏遊兵各一枝與總督標

兵併力協謀相機決策又將該路主兵蒐簡選補務

足原數各復營伍議給本色糧草及將運道所經牛

心等堡亟圖修理務令堅完整理官兵足給糧餉使  
救援可達轉輸無阻以保孤懸重地等因題奉 聖  
旨這所議都准行欽此隨該戶部覆議准發銀三萬  
八千四百兩以抵補原議空運米豆之數續又准戶  
部咨為陳時務以圖安攘事議將紫荆關新城浮圖  
峪倉見貯米豆每倉各動支米五千石共二萬石陸  
續轉運右衛交割等因題奉 聖旨是欽此通行欽  
遵去後今該前因查呈到部看得巡按直隸監察御  
史欒尚約具題備言右衛被虜困圍糧餉不繼採樵  
不通十分急危宣大兩鎮邊牆墩堡城池俱不足恃

况饑饉相因軍馬單弱乞要大破常格急為調兵運  
餉仍乞叮嚀總督江東嚴督鎮巡官員同心協力以  
解右衛之圍及稱大同副總兵王尚忠才欠發揚恐  
難展布原任叅將尚表勇謀兼全右衛非表斷不能  
守乞要將王尚忠別用即以尚表代之各一節為照  
大同逼隣虜衝連遭兵荒軍寡糧乏疲敝已久其在  
右衛孤懸西陲被虜圍困至今未解尤為危急若非  
大破常格議處兵糧委難救濟荷蒙 皇上軫念邊  
防屢發帑截工資銀兩乞運糧料徵調各路官兵務  
期驅賊出境是在常事諸臣仰承 德意夙夜奉行

多方經略以保無虞其右衛孤危全在將領得人庶  
可保障地方副總兵王尚忠廉雅有餘揮霍不足委  
難堪此所據原任叅將尚義生長其地練達老成恩  
威素著人心久服若行更代必能保全但查本官原  
因年老致仕伊男已經替職若准代王尚忠責任查  
無事例然當此危急之時似難拘泥常格况該巡按  
御史欒尚約目擊其事訪知其人具題前來相應  
通行議擬題請合候命下將王尚忠革任回衛聽  
候別用就將尚表暫令代任副總兵事本部備查原  
擬責任請勅一道行令欽遵行事合用符驗旗牌



境以解圍困保全地方勿得仍前玩愒致誤事機嘉  
靖三十七年四月初一日暫管兵部事刑部尚書鄭  
等具題本月初三日奉 聖旨是王尚忠革任回  
衛尚表着代任副總兵事寫勅與他還賞銀三十兩  
彩段二表裏錢糧戶部你速發運前去欽此

議處重鎮將官疏

題為議處重鎮將官事職方清吏司案呈照得薊鎮  
建昌副總兵馬芳奉有 明旨統兵前赴大同右衛  
救援建昌副將似不可缺人同副總兵尚表該在左  
衛駐劄今見在右衛城中叅將麻祿該在右衛駐劄

今與尚表同在一城呈乞議處等因案呈到部爲照  
副參將官各有協守分守之職必須責任分明體統  
專一庶可約束官兵畫守信地伏望 聖明俯賜裁  
察將馬芳改爲大同左副總兵其遺下建昌副總兵  
員缺容臣照例會官推舉相應官二員請 旨簡用  
其尚表該在大同左衛仍留右衛與麻祿同心協力  
共守城池內安人心外禦醜虜務收全功仰報 朝  
廷超格陞賞厚恩各官符驗旗牌照舊收用其馬芳  
勅書查照原擬責任另行請給左衛應否別設官員  
咨行宣大總督尚書楊 杏議具奏定奪嘉靖三十



七年四月初八日進初十日奉 聖旨尚表代任副  
總兵馬芳應援都着照前旨行候右衛賊退另議建  
昌副總兵王忬便選委相應將官具奏暫管

會議大同巡按欒尚約題兵餉疏

題為進兵運餉乞 勅督撫將領官員嚴加戰守以  
慰 聖懷以安重鎮事兵科抄出巡按直隸監察御  
史欒尚約題臣於四月初五日至大同鎮城見得總  
督侍郎江 調取官兵已分管伍糴買軍儲漸足支  
用所當進兵之時矣隨該侍郎江 於本月十一日  
會同巡撫大同右僉都御史楊 督同鎮守大同總

兵官張承勛統兵前赴右衛訖臣愚以積久未練之  
兵恐難取勝於一戰而糧草所備未多又難以爲持  
久之謀縱右衛之路通而糧餉稍入臣聞右衛之內  
粟米竭矣牲畜盡矣房屋燬矣餓殍者衆矣老幼饑  
餓而不能興者不知其幾矣耕稼廢於歷年而田畝  
爲醜虜之牧地牛具供於炊爨而農夫爲鋒鏑之寃  
魂苦楚之狀難以言悉者也若不仰賴 聖恩大加  
賑濟以備不虞恐數萬生靈雖少蘇於萬死一生之  
後七八月間胡馬強壯信內逆之勾引效已徃之久  
圍則右衛之路暫通而復阻今日之兵雖散而復徵



九卿科道官爲國保民議上欽此欽遵抄出到部臣  
某會同九卿科道等衙門吏部尚書等官臣吳 等  
看得巡按直隸監察御史樂尚約題稱大同右衛地  
方殘破已甚耕稼廢於歷年而田畝爲醜虜之牧地  
牛具供於炊爨而農夫爲鋒鏑之冤魂乞要仰賴  
聖恩大加賑濟仍要嚴 勅督撫諸臣同心協力務  
在剷除待右衛既通之後守者多給粟米耕者多給  
牛種量地里而加修墩堡酌要害而添設將官至於  
應援之兵可以調用兵馬之費可以儲積者乞 勅  
戶兵二部速加議處各一節臣等會議得大同右衛

又爲虜困若使往年巡按御史據實奏聞早爲區處豈致危急如此所據御史樂尚約奏稱欲救目前之急必須調遣援兵積儲軍餉欲爲經久之計必須仰賴 聖恩大加賑濟守者多給粟米耕者多給牛種量地里而加修墩堡酌要害而添設將官皆禦虜安民之計深爲有見相應會議擬奏除調遣援兵節該兵部題奉 欽依督發主客官兵十一枝已經月餘量已調集其積儲軍餉節該工部陸續給發帑銀共三十餘萬兩買辦糧草已運至左衛者但虜退之後即爲久遠之計四事要宜區處相應大發帑銀早

為賑濟或一時運解未及就於見到大同銀兩內動支四萬兩內二萬兩計等右衛官軍民戶分別賑濟作為米粟之數二萬兩給為屯種官民田地牛種之資戶部即將今次用過銀四萬兩照數補完至於扣修墩堡則或仍舊貫或創新營務須并及邊牆通行整理據扼險要控制賊衝我得通行賊難邀阻添設將官則如左衛威遠平虜等衛牛心高山等堡可以聯絡聲勢互相犄角去處大則副將小則遊守隨宜設置揀選將領及時預防此皆御史藥尚約奏內事情臣等酌議具奏此外尚有四事一則該鎮軍少輒

調客兵往來勞費無益戰守必於各衛所官軍舍餘  
內及土著居民多方抽選召募揀拔精壯補足原伍  
時加訓練應得糧餉照例支給一則邊儲缺乏實由  
鹽法廢壞不收本色專徵折色以飛輓良法久廢不  
講即今危急雖積金如山何益於事為今之計必須  
議復飛輓開中鹽引定收本色仍減斗頭勿徵銀兩  
庶使富商豪戶各自赴邊春農之際既能借貲本以  
助耕種秋收之時又能收米粟以易鹽引邊地自然  
開墾糧料自然充足安邊足用此為急務但每言及  
此人皆視為迂緩不濟急用殊不知三年之艾自今

蓄之尤爲可及不然年復一年動支內帑坐困東南  
耕種之民無益西北饑疲之卒庫藏日至空虛邊鄙  
日至荒廢矣一則官吏貪殘軍民困苦忍棄鄉土甘  
從醜類亟宜嚴設文武官員用心撫綏軍民多方設  
法招回在虜人口免其糧差加意安輯一則有名逆  
賊多在虜中勾引遮逃且歸且叛反覆無常須要密  
謀曲計或購賞以擒渠魁或遣間以離黨與務使互  
相疑貳莫敢近邊凡此樂尚約所奏臣等所議事件  
皆是虜退路通之後方可施行至於酌量事勢相度  
時宜全在總督大臣審處合候 命下各行總督尚



書楊

嚴督該鎮巡等官同心協力先救目前之急

趁此兵餉既集之時即便驅賊入餉以解右衛倒懸

之苦隨將賊退路通修墩堡築邊牆設將領等項并

今會議足兵足食內收人心外携賊黨事宜各要乘

時刻期着實舉行未安重鎮上慰 聖心其賑濟銀

兩塔行都察院劄行御史樂尚約督領守巡等官設

法給散務使人沾實惠事完徑自造冊奏繳此外若

別有關係目前要務日後遠猷應處置者仍聽總督

大臣作速議奏以憑覆請 定奪臣等忝受股肱耳

之任值此邊陲多事不能出謀宣力為 國保民

仰體宵旰之懷致蒙皇上勅下廷議謹叅合衆  
論上乞聖裁臣等無任惶悚待罪之至嘉靖三十  
七年四月十七日兵部等衙門暫管本部事刑部尚  
書等官鄭等具題本日奉聖旨都依議著實舉  
行其有未盡事宜楊博作速計議奏來欽此

覆給事中徐浦條陳疏

題為懲前慮後陳愚見以裨邊務事該工科給事中  
徐浦題云云奉聖旨兵部議了來說欽此欽遵看  
得大同右衛圍困逾年互相欺敵幾至不守仰賴  
皇上神武大錫明見萬里赫然斯怒斷在必行本兵

守臣一時更易調集官軍給發糧餉超格賞功差人  
勘覈罪無巨細皆出宸衷臣下敷奏裁察可否即  
時批荅今日重鎮旣危而復安邊民將斃而更生者  
秋毫皆帝力也逐虜入餉之後總督尚書楊 又  
能仰體 聖懷天心圖報竭力經理必求久遠之圖  
不為目前之計一應足兵足食設險設官內收人心  
外携賊黨緊關事務相應悉聽便宜處置應具奏者  
隨事奏 請况本官前奏亦稱叅兵部節年之議題  
查廷臣累月之建白事在可行者不敢執泥以為非  
事若難行者不敢依違以為是則其忠誠任事定見

定力足稱任使不必一一遥度遥制以示專閫之意  
所據工科給事中徐浦條陳一曰定經略以立遠謨  
二曰重閫權以責成效三曰舉將才以備任使四曰  
守險要以防衝突俱係邊防一時要務相應分款議  
擬以便 聖覽伏望 皇上俯賜依允勅下遵行地  
方幸甚計開一曰 云云 二曰 云云 三曰 云云 四曰 云云

云云 及照給事中徐浦於條陳四事之後又欲久任尚  
書楊 為宣大總督不為無見但尚書楊 志慮忠  
純才識明練在內歷任職方郎中兵部尚書在外歷  
任藩臬巡撫總督其於地利險易將校勇怯守禦緩

急虜勢堅瑕無不周知至於秉持實心幹辦實事必不可及見今右衛稍寧本官即能條上方略刻期修舉兩三箇月事必就緒本兵重地內練六師外籌九邊江海閩廣所在未靖必須楊 居中調度庶可上副 聖明委任責成之意况節奉 明旨總督官不必推且着楊博去事寧回部欽此欽遵此寔 皇上神謨廟筭徹首徹尾周悉萬全臣某荷蒙 知遇暫管兵部事若復含默不言他日誤事萬死莫贖昔舜命九官濟濟相讓成周分職推賢讓能伏乞 皇上睿公揚 經理大同少寧之日欽遵 明旨回部任

事其於軍國政務必有補益均乞 聖裁嘉靖三十  
七年四月二十七日題奉 聖旨是欽此

覆巡按王御史倭寇疏

題為哨報夷船事職方清吏司案呈奉本部送巡按  
浙江監察御史王 具題奉 聖旨兵部知道欽此  
抄出送司卷查先該總督浙直右都御史胡 等題  
為哨報夷情事該禮部與本部會議得宣諭日本國  
王生員蔣洲帶同豐後守源義鎮遣僧德陽前來稱  
貢雖有使物原無印表勘合山口都督源義長回文  
印信可驗稱名又非國法俱各有違難以准信稱貢

方物照例阻回報效鄭舜功姑帶夷僧清授與審前  
德陽乘屬同島似應一同遣回已經題奉 欽依通

行欽遵去後今該前因查呈到部看得巡按浙江監  
察御史王本固具題前因大率言豐後進 貢夷僧

德陽已經議覆阻回至今尚泊外海輒與岑港夷人  
合艘一處釁萌已動而叅政王詢叅將張四維總兵

官余大猷玩夷弛禁以致兩夷得以合謀逼挾將官  
及稱軍門一則謂風汛之未順一則欲留之以誘致

王直毛海峰殊不思假夷誘賊機或發於偶中夷心  
猜猾變斯生於久留防虞未周當任其責前項有罪

官員候事寧另行叅奏各一節為照夷僧德陽原係  
豐後遣來貢使已經奉有前項 欽依遣回當事諸  
臣不能仰遵德意遲疑懈弛遣留未決以致兩夷交  
通逼挾將官即今春月將盡尚爾稽留內地但恐夷  
情狡獪變詐不常致使彼此合艘乘釁構禍方行驅  
逐必致勞師費財貽患匪輕既該本官具題前來相  
應議擬題請合候 命下本部馬上差人移咨總督  
右都御史胡宗憲查照先今事理一面將夷僧德陽  
等宣諭 朝廷德威令其嚴加禁戢從夷作速還歸  
本島如或展轉遷延即行嚴督水陸主客官兵驅逐



出境以弭交構禍端一面將岑港夷賊上緊設法極力剿撲勿墮賊計要之順逆既明撫剿自定形情已著耳目甚多若藏頭露尾掩耳偷鈴恐一旦墮裂財力俱困貽害東南關係匪細嘉靖三十七年三月題奉 聖旨是欽此

兵部印信疏

題為印信事武庫清吏司案呈照得本部印信銜官掌管先該刑部尚書鄭 奉 欽依暫管今有本部左侍郎江東公差回部呈乞議處等因案呈到部伏念臣某質本凡庸不堪任使本年三月二十日荷蒙

聖旨兵部權着鄭曉暫管左侍郎缺便會推兩員來  
看欽此欽遵臣某不勝感戴即赴兵部暫管外次日  
隨該吏部會官推補兵部左侍郎員缺節奉 聖旨  
東陞本部左侍郎欽此其時江東先奉 明旨暫管  
宣大總督事今於五月初二日回京朝見為照左侍  
郎江東原係兵部堂上官逐虜入餉克效勞績奉有  
恩命陞賞服色銀兩衣服襲所有臣某暫管兵部印  
信伏乞 欽定江東署掌臣某回部辦事嘉靖三十  
七年五月初二日進初四日奉 聖旨是印着江東  
署掌吏部知道欽此

選軍疏

題為營操官軍節年逃故數多懇乞 天恩收補原額以實京營以壯國威事准本部手本該本部題職方清吏司案呈奉本部送兵科抄出該總督京營戎政鎮遠侯顧 等題前事等因奉 聖旨兵部知道欽此欽遵抄出送司案呈到部看得臣等題稱要將見操官軍精壯者存留老弱者摘牌替役事故原逃許其報名頂補自首免究仍通行各該撫按等官清勾辭補各一節為照選練兵卒充補行伍實戎政首務今營兵強弱相半數虧原額委應清補既該具題

前因相應議擬合候 命下行移總督戎政文武大

臣會同巡視京營科道官并本部委官一員前到各  
營逐一清查除精壯者照舊存留外老弱者許令在  
冊應繼壯丁審驗明白摘牌替役隨具通狀告部行  
衛保結委係應役之人方許造冊收糧其有逃亡事  
故各營即行該衛查將冊內有名舍餘軍丁審係正  
身儘數報名赴部以憑覆審選取精壯補伍各該衛  
所官職不許措勒需索以致貧軍不得替補原逃如  
係壯丁俱准自首復役逃三次者照例送問其有拐  
馬及拖欠椿朋銀兩該營查追完日方准食糧招募

新軍止終本身不許一槩繼補舊年在營無丁者轉行各處巡按御史嚴行各該清軍官查照本部勾單著實清勾起解年終造冊送部查考以別勤惰如此汰選既精替補不缺京兵庶得實用原數可足而營伍亦漸充實矣等因題奉 聖旨是欽此欽遵備行到營通行五軍等三大營副叅遊佐等官署都督僉事雲冒各將官軍衛所姓名年貌文冊造遞前來臣等遵奉 欽依於本年三月初六日爵等會同巡視京營刑科給事中張 河南道監察御史盛 兵部交官職方清吏司主事陳 在於教場內照營對冊

逐名揀選得五軍等三大營大寧前等衛精壯官軍  
劉經等九萬七千五百二員名照舊存留在營操備  
其餘官軍臣等酌議分爲九項一項大寧前等衛祖  
軍老疾商丑頭等一千八百一十三名各領精壯弟  
男子姪赴營告替臣等督同該衛掌印官吏旗識揭  
對編軍文冊相同即便遵奉 欽依摘牌替役仍令  
告赴兵部驗軍官處查考又一項原係祖軍亦有精  
壯弟男子姪偶因貧乏失於報冊大寧前等衛軍人  
解道公等一千一百九十九名爵等督同各衛掌印  
官吏旗識係各軍親丁相應一體摘牌替役隨具通

狀告赴兵部驗軍官處查發收操又一項大寧前等  
衛軍人楊玉等八百九十八名原係軍餘舍餘先年  
募充軍役一向營操不缺今已老病合帶精壯弟男  
子姪告替但見行事例旗手等七十八衛所自弘治  
年投募軍人俱不准替今查得各軍中間多有已經  
替補一輩二輩者緣此等軍役餘丁例不報冊臣亦  
督同各衛掌印官吏旗識面審是實况其敗居城郭  
跟隨父兄出入營衛習聞軍令衆皆認識別無詐冒  
比之近年五城招募四方自徠米貴食糧米賤逃躲  
大不相同相應准令隨具通狀告赴兵部驗軍官處

查處收操又一項和陽等衛營操軍人趙聰等四十  
九名原係騰驤四衛勇士遇例改充前役今年老有  
疾各帶精壯弟男子姪告替如前面審委無詐冒又  
一項冊籍有名原告操備蔚州左等衛軍人安玉等  
六十名原係招募民人充軍送營操在京居住年久  
難回鄉井各帶有精壯弟男子姪告替亦如前審相  
同仁事例有云錦衣衛及騰驤四衛自天順年間投  
募充軍俱不許替又云嘉靖八年清革勇士充軍俱  
不准首補又云錦衣衛軍丘敖等五千名俱不准首  
補又云騰驤四衛莊勇等四千名俱不准首補竊詳



前例四條止爲錦騰五衛投充本衛軍勇士不許仍  
替原衛非謂錦騰等五衛軍勇餘丁投充和陽衛等  
營操軍役也相應北照大寧前等衛舍餘募充軍役  
一體許令隨具通狀告赴兵部驗軍官處查發收操  
又一項長陵等八衛軍先年係俱京操近改鞏城  
黃花鎮等處操備其間尚有存留京營操練老疾軍  
人杜丙仔等七十六名亦有精壯弟男子姪告替相  
應容令隨具通狀赴兵部驗軍官處一體查發代操  
又一項各衛營操官年及六十并赤及六十患有癩  
疾者義勇右等衛千戶等官李堂等一十九員相應

行衛督催保送優養兒男年幼者保送優給各住俸  
糧又一項戶絕老病府軍右等衛軍人尹祥等一百  
八十六名情愿告退即與除免又一項原逃者如係  
壯丁俱准自首復役逃三次者姑免送問限一月內  
自首收操又一項逃亡事故缺伍者照依兵部原議  
各營即行該衛查將冊內有名舍餘軍餘及未曾上  
冊各官軍戶丁壯儘數報名赴部覆審選取精壯補  
伍管操不許別項雜差悉聽兵部斟酌節年抽選事  
例題 請施行仍嚴禁官識需索沮抑貧難妨誤軍  
務仍行各處巡按御史嚴督各該清軍官查照勾單

着實清查解衛送驗發差再照節年營伍空虛隨時  
招募僅勾派撥即便停止惟知愛惜錢糧竟缺原額  
軍旅年復一年消耗日甚以致三大營見在官軍止  
有九萬七千五百二員名比與舊額數虧一倍况見  
在揀選中間一半皆係先年招募抽選官軍舍餘及  
勇士革退各衛所軍弁 長陵等衛存留京管之人  
若不通行破格查補只靠清勾原籍戶丁文移往返  
虛應故事何日得完防秋緊要豈能濟急邇年仰仗  
天威 玄佑畿輔安堵臣等少造罪愆今年春月虜  
已大舉深入搶掠大同又聞宣府薊州遼東邊外各

有虜衆分管住牧苑伺既久捍禦寔難 京師切近

關塞尤宜先事預防昔唐虞之盛每以變夷猾夏爲

憂成康之時尤以克詰戎兵爲戒今日制治保邦居

重馭輕教飭京營軍馬最爲急務萬一虜營未遂遠

邈郊外列營 都城九門 重城五門擺列巡城守

舖遊兵并 天壽山守護 陵寢皆係三大營軍官

調用如以見在官軍間常操練足張威武遇警調發

數實不敷臣等職司戎務日夜憂懼豈敢含默必須

審度時勢簡省科條不拘近例務究遠圖始克有濟

伏望 皇上勅下兵部再加詳議如果臣等所言不



大工軍役疏

題為欽奉 聖諭事准兵部手本該禮工二部具題  
修復朝堂奉 聖旨茲先作朝門并午樓為是殿堂  
即隨次為之一應事宜你每便會官議處停當來說  
欽此會題奉 聖旨都准議行欽此內一件許處做  
工夫役查得先年營造 乾清等宮供備內外各色  
人匠及摘撥三大營并錦衣騰驤等衛軍校力士共  
十萬員名輪流做工運料及稱工程浩大官軍必不  
能敷要照例僉派直隸河南民夫應役又准工部手  
本照得修復 殿堂朝門午樓工程重大煩速摘撥

軍夫運木一萬名運石一萬名工上搭廠卸料一萬  
名共三萬名前來等因通行到營臣等看得會題共  
十萬員名一項各色人匠一項三大營軍一項錦驤  
五衛軍校力士也所謂輪流做工者五萬人接工也  
及查三大營見在正備兵通計不過九萬七千餘名  
近奉 明旨挑選精銳官軍十枝并標下隨征共三  
萬五千三百員名選委將官雲冒等統領操練聽調  
出戰此外止有六萬一千餘名以備分布內外拱護  
京城 陵寢又查得嘉靖三十三年三月內該先任  
總督京營戎政太子太保平江伯陳 等題稱各項

程愷急將外衛班軍查照舊規挨次撥用各將備  
兵正兵一體休息操練防守聽征等因奉 聖旨是  
兵部知道欽此欽遵伏惟 皇上鼎新戎政各項工  
程不許撥用三大營正兵備兵即今修復 朝堂事  
體重大臣等遵奉 明旨恪守欽定戎政豈敢輒動  
三大營官軍所據會題軍夫三萬名應於班軍內摘  
撥但先年中都山東河南大寧四都司班軍十四萬  
六千八百餘名近年大寧班軍五萬七千六百餘名  
盡數存留薊鎮中都班軍四萬一千九百餘名盡數  
存留防禦倭寇止有山東河南二司春秋兩班官軍



四萬七千二百餘名見在到班上有一萬三千二百六十八員名尚不教 帝真工所一處輪撥除大寧班軍防守薊鎮無容別議外畱守司班軍必須分別議處如揚州儀真高郵淮安大河邳州六衛通州泰州興化鹽城東海西海六所設在揚淮二府地方功近江海其班軍六千七百八十五員名相應存畱防

倭 皇陵衛原奏畱班軍三千二百二十五員名泗州衛二百八員名切近 祖陵 皇陵高牆相應存

護其餘各衛所與江海 二陵高牆相遠及潼關 歸德沂州三衛汝寧莒州二所雖隸江北原在山

東河南地方春秋兩班共三萬一千七百四十二員  
名相應行令彼處巡撫將嘉靖三十六年秋班并三  
十七年以後春秋班官軍嚴限赴營聽撥應後若延  
捱潛躲挨拏鎖解罰班補工司衛所掌印并劄付官  
坐視賣放不到數多及違限者聽部營叅拏究問又  
查得山東河南中都三司嘉靖三十三年秋班三十  
四年春秋兩班三十五年春班奉 欽依追解脫班  
抵役銀兩共二十二萬九千四十六兩四錢未見解  
到一兩嘉靖三十五年秋班未到官軍一萬六千八  
百八十員名原行各撫按挨拏解京濟上至今並無

一軍到營亦應免提合照前例追收脫班抵役銀兩  
該銀六萬七百九十六兩八錢通計五班該銀二十  
八萬九千八百四十三兩二錢相應徵解接濟工程  
不然赴班者獨受勞役脫班者慣得安閒相率效尤  
益致怠肆再照木料石料廠料木審有無見在何處  
的於何日搬運所用三萬人若照原題輪流做工每  
班止該一萬五千人若三萬人通作一班上工則再  
須三萬人接替便該六萬人原議官軍不敷必須仍  
照原議雇役伏望 勅下兵工二部再加詳議務要  
欽遵 皇上鼎新戎政及節奉 明旨將三大營官

軍專一操練拱護防守修復朝堂軍夫三萬名專在  
班軍內摘撥其山東河南該班官軍一萬三千二百  
六十八員名俱見在 皇真工所輪流做工候工完  
之日掣回供役及馬上差人催促山東河南今年秋  
班官軍并將中都班軍定擬應存留者暫且存留應  
赴營者嚴限督發其山東河南中都三司共該徵脫  
班銀二十八萬九千八百四十三兩二錢亦要行令  
新差查徵工部錢糧御史作速徵解兵部兵部轉發  
工部雇夫仍行本營知會及查見在木料石料廠料  
若干見在何處的於何日搬運所用三萬人仍照原

題分爲兩班輪流做工官軍不敷仍照原擬雇役庶  
幾營務不廢後書有程臣等既得仰遵 聖明裁定  
之戎政亦不失諸臣會題之初議矣題奉 聖旨兵  
工二部看議了來說欽此

取用錢糧疏

嘉靖三十七年三月初五日該司禮監太監王利傳  
奉 聖旨近日右衛地方內逆勾虜擾犯必須多調  
兵馬逐剿其糧餉缺乏着九卿堂上并科道官曾任  
巡撫二司及有司者知各省各項錢糧可有設法計  
處堪以取用的各要明白條陳具奏人同戰守事宜

文武機官應該更置的兵部詳議來說欽此欽遵伏  
惟 皇上軫念邊陲 宵旰靡寧屢勤 清問博采  
群策臣忝受軍旅之寄不能仰贊萬一實切慚悚謹  
條陳二事上塵 聖覽伏乞 勅下該部再加詳議  
施行臣愚不勝幸甚萬一虜騎未退衛城未開阻我  
耕收斷我樵汲雖月給萬金終難濟務昔人謂七年  
之病必求三年之艾自今蓄之猶為可及然此實非  
臣愚所能知也嘉靖三十七年二月題奉 聖旨戶  
部看了來說欽此

計開

臣嘗叨任江北巡撫見南京太僕寺所轄地方  
養馬之民每年納馬不勝愁苦解馬到京發民  
寄養又不勝愁苦及至俵邊騎操馬已瘦損草  
料不敷致多倒失追徵朋椿又不勝愁苦而所  
在守臣徃徃以有軍無馬有馬無糧草爲辭臣  
愚欲令南京太僕寺今年該解馬疋盡徵折銀  
每馬一疋例徵銀二十四兩今令納銀三十兩  
民亦稱便一半發邊買馬一半發邊養馬買馬  
之官但求壯健無得苛察養馬之資必須給足  
無得扣除仍嚴禁將領先邊人牽得馬疋不許

攘奪亦不許勒減價銀邊人勇於趨利自能多方尋覓如此南畿之民無納馬之勞北畿之民無寄馬之困邊鄙得瞻馬之用戶部省飼馬之財獲馬者得市馬之利失馬者被耗馬之害而守臣亦不得以無馬無錢糧為辭矣通計該寺歲徵馬八千四百九十三疋每疋折銀三十兩該銀二十五萬四千七百九十兩內除一半差官到邊買馬抵足該解本色之數尚得餘銀十二萬七千三百九十五兩此項錢糧似堪計處取用以補一時糧餉缺乏伏乞 聖裁



一臣叨任協理戎政見本廳有戎政之印先任漕  
運見總兵官漕運之印又查得洪熙元年頒給  
征虜征蠻鎮朔鎮西等將軍九員掛印共十一  
顆皆虎鈕印信各官又皆公侯伯都督爵秩既  
崇軍務尤重未曾設有知印臣愚欲照一品五  
府衙門例各設知印一名開例納銀此等役色  
上納之後不必候缺便得收叅實歷滿日不必  
省祭便得收選比之生員接例選除甚速品職  
稍同若一處准納五名每名納銀數百兩查照  
年分先多量定銀數實計該知印五十五名可

得銀二萬兩况兩京文武一二品衙門始有知  
印數亦不多此於選法原不相妨似應開納以  
補一時糧餉缺乏伏乞 聖裁

鄭端簡公奏議卷之十一終